

摘藻堂四庫全書薈要

集部

欽定四庫全書薈要

集部

御選元詩卷十三

詳校官原任主事

臣李斯咏

欽定四庫全書薈要卷一萬八千四百二十五

集部

御選元詩卷十三

五言古詩二

戴表元

次韻荅朱侯招遊海山

江南春草黃江北秋雁飛窮居念還往故物悉已非我
有青雲交山林可同歸十年學撫琴對客輒累歎豈不
願和悅調苦心易悲青天無古今白日相因依向來炎



炎人所得一何微成者化埃塵不成翻禍機玉美受雕
鑄馬良遭絆韉所以曠達士但貴知我希請休接輿歌
且急梁鴻噫名微少士責身閒免官譏寧無一日力相
尋盡嶮崎霜魚碧玉鱸水菊黃金暉君歌我按筑我舞
君攬衣此日為君歡醉遊敞船扉

題陳高士所藏冬青枝上白頭翁畫

飛高得珍叢青子饑可食不知何憂愁二鳥頭亦白道
人天機深清齋意相許賴汝不能鳴一鳴嫌殺汝

浴蠶沙溪水一首為上饒陳烈婦作烈婦信州
上饒人嫁同郡葉氏年二十五生子四齡而寡
丙子兵寇起能以智全其家歲饑發粟賑貧類
大丈夫慷慨知大節非徒守閨門貞行而已有
司上其事賜旌表蠲復如法

浴蠶沙溪水采桑玉山巔絲成白稜稜膠作烈婦絃烈
婦何所言絃中意纏綿一說驚影孤二訴離巢穿巢穿
尚可算影孤恨終天有食不自肥衆禽仰喉咽真宰憫

其疲勞役盡弛蠲及今雖長成雖舉亦翩翩朝陽照巖
林枯槁生光妍黃蘗誰謂苦鐵石誰謂堅請君屏俗耳
聽我沙溪篇

君莫誇少年一首贈余光遠

君莫誇少年與我憊者疎我亦嘗少年少年君不如談
諧今已忘猶有少年餘東南山水國早得飛長裾春園
虎丘樹夏檻玉泉魚吳妍與楚豔過眼日千車當此秋
氣淒遊子易欷歔我時未更事意氣益發舒出門有佳

侶遇勝不得虛惟憂日晷短當去亦躊躇官曹人所厭
高士不肯居平生縱觀處最在客南徐姻黨四面集綵
衣擁安輿停觥待淮蟹醇甘逮僮胥道路無此願此願
勝鄉間自從秣陵歸鬱鬱不再攄三間風雨屋僻在荒
林墟非君好事者誰能至吾廬今來建溪上逢君屢相
於行藏且勿問人世有乘除舊狂吾已悔新銳君當祛
男兒不用世資身在犁鉏臨風贈君別勸君惜居諸勸
君重桑梓勸君重名譽歲晚未相忘頻寄山中書

老樹

老樹老且枯，數柯枝綴之。蟲來食其葉，藤來纏其皮。幸
然根本堅，未至甚離披。風霜既無損，雨露猶見私。如何
烏鳥輩，同巢自傾危。鬪擊翼似斧，啄傷背如錐。樹色歲
時減，樹力日夜衰。回首試一顧，但可相扶持。

伯收東岡麥

伯收東岡麥，仲移西塍秧。四季各有役，餬口走皇皇。豈
不惜冠履，無嘗業縑紉。憐爾衣食微，及茲筋力強。古來

經術士什九起耕桑窮通自天命謹勿事胥商

次韻焦治中雲洞紀遊十四韻

是身虛空中如雲本無有遊行又其寄縱樂安得久嵌
巖大硯質鑱削奇鬼手棟宇起何年名稱出誰口憶昔
扳藤蔓凌空訝雞狗踈踈石生竅剌剌室懸斗乘峻開
棧梯緣明挂窗牖豈無題辟堂多逢斫畬叟賢侯韋平
家雅韻王謝友驪珠百四十模寫已八九坐我南樓牀
澆我北海酒人生主客意如此豈云偶風花命浮沈木

雁天可否悠然付一噓山靈儻回首

宿福海寺

斲巖蒼龍角汲流紫雲根道人
不絕俗自然無耳喧屋脊挂修
嶺一日過千轅此中但高卧松
風有清言聽之亦無有風定松
在門炊成我欲去獨鶴鳴朝暾

春風

春風吹愁端散漫不可收不如
古溪水祇望鄉江流新花紅爍
爍舊花滿山白昔日金張門狼
籍餘廢宅回首

語春風莫向新花叢我見朱顏人多金亦成翁多金不足惜丹砂亦無益更種明年花春風自相識

八月十六張園翫月得一字

明河盪殘雲青海收晚日婆娑林端月為我良久出洗杯問勞苦天女笑矜矜月行虛空中萬古無損失且可娛今宵勿復思昨日歌情天水遙坐影人樹密嗔醒有徵酒徵詩或呼筆仲容歡入林懷祖嬌在膝初猶整褐裘久乃忘冠櫛趨踣翻奕盤笑傲驚帳室寧來共喧呶

不許私暇逸蚩蚩復擾擾醉態不可一情知此月下此
樂世無匹月光本天性清瑩本其質動定極淳涵聲沈
轉蕭瑟匆忙記醉語悟遲已難述

仇遠

題高房山寫山邨圖卷

并序

大德初元九月十九日清河張淵甫貳車會高彥
敬御史於泉月精舍酒半為余作山邨圖頃刻而
成元氣淋漓天真爛漫脫去畫工筆墨畦町余方

棲遲塵土無山可耕展玩此圖為之悵然而已

我家仇山陽昔有數椽屋誤落城市間讀書學干祿井
枯竈煙絕况復問松菊如此五十年一出不可復高侯
丘壑胷知我志幽獨為寫隱居圖寒溪入空谷蒼石壓
危構白雲養喬木向來仇池夢歷歷在我目何哉草堂
資政爾飯不足視吾吾尚存吾居有時卜

白珽

題斬蛟橋

桓桓周將軍英烈照千祀少年知自艾成仁不惜死射
虎南山下斫潛北橋底騰拏三日夜瀝血四十里激波
為嶽立揮刃電亦駛想當批鱗初見義不見水及其立
人朝矯矯中不倚文學既英發武事復霆起殲兒善醜
正甘作忠義鬼至今有生氣耿耿耀青史蘇公百世豪
氣味有相似泊舟蛟川下洗石題所以平生疾惡意十
有二言裏豐碑刻祠宇詞翰晉二美二美固足珍吾取
不在是

同陳太傅諸公登六和塔

龍山古化城浮屠峙其巔開殿生妙香金碧森貝筵應
真儼若生倒飛青金蓮頭陀紺林叢導我丹梯緣初猶
藉佛日閔境儵已元回頭失誰何叫嘯衣相牽且復忍
須臾當見快意天嬌兒詫先登網戶相鈎連炯若蟻在
珠九曲隨盤旋爛爛滄海開落落雲氣懸羣峰可俯拾
背閱黃鶴騫奇觀興懦夫便欲凌飛仙絕頂按坤維始
見南紀偏神京渺何許王氣須停躔舟車集百蠻島嶼

通人煙一為帝王州氣壓三大千剛風灑毛髮鐸語空
蟬聯紅紅杏花園媿乏慈恩篇

冷泉亭

靈山本清淨一泉渟其中靈山孤飛來此水將無同山
影厭不盡照見天玲瓏分明千尺冰不獨疑寒蟲京洛
多風塵到此一洗空炎寒無二心凜有操者風留然守
空梵萬劫豈終窮驪山有溫泉虛築華清宮

山居懷林處士

昔在林處士結廬鄰峰巔年年不入城梅花有佳聯童
鶴三數口負郭十畝田弟姪列朝裾咸平好時年人品
既已高奉養常充然嗟我何為者日用買山錢愛詩不
能佳未了區中緣空有一寸心羨殺處士賢飽看貴人
面不若饑看天推牀呼伯雅且此相周旋有田足幾時
卓哉坡翁言

吾丘衍

龍吟軒

四山若龍盤精廬剡溪曲中有不蟄龍長吟破幽綠道人宴坐起拂袖窗牖開手持碧琅玕聽此風雨來

張伯雨贈黃精

山中有靈草乃云太陽精况聞天老言餌之可長生故人赤松意分贈慰我情玉津比靈芝采采三秀英我願服此久飄然出蓬瀛綠髮無秋霜身如羽翰輕舉臂入霄漢丹臺列高名手把金芙蓉與君遊太清

古詩一首送翼之回吳

遊子動歸思南風起秋聲我亦當此時相送難為情交
朋尚如斯况爾懷父兄三吳亦鄰邦一水非遠程君還
姑蘇臺我留鳳凰城兩地各相望馳心互奔傾流光若
頽波彼此即寓萍浮世苦離散輾轉百慮縈何能慰予
懷握手徒營營

菌耳徧沃野

菌耳徧沃野瓊芝亦芬芳羣陰掩其茨誰復知爾良我
願得此草移根植崇岡閒攀紫金蕤挹露晞朝陽服食

換綠髓輕舉過紫皇招攜三辰遊與之同輝光

胡長孺

題山外歸人

結屋北山阿境趣適有契閒寂聊悅心深密非避世誰
令賦遠遊山空冷蘭蕙人間萬得喪欣戚隨所制頗似
觀優伶笑語雜悲涕戲弄刻漏間陳迹安足寄策杖歸
去來溪深亦朝厲陟嶺見我屋竹柏松杉桂雨餘青一
色淨埽如作簣行可休此足無言得深詣

龔璠

偕林彥達天平即事

籃輿過西郊故指長松樹幽尋得清深古藤蛟蛇聚聊
為取徑來復作尋澗去峩峩天門山僧坊掩其處稽首
忠烈祠茲遊有神助違世常獨行會心有同趣手斟白
雲泉一洗儒者腐躋攀龍門上滄海欲竟渡狂嘯風雨
飛血肉那可住俯觀大千界莽蒼盡回互病夫杖藜還
數息安窘步之子凌絕頂相失不可遇俯廊把臂笑物

色方受句跣趺贊公房茶甌要深注蹇予每多艱沮如
沾兩屨肩僕亦已痛重負寧少恕前途更回首空翠灑
嵐霧持此將安歸濟勝自非具知津問長沮無淚灑羊
祜平生樽酒期中秋月當戶

題劉文偉府判收藏山莊夜歸圖

盤桓長松樹莽蒼歸薄暮惟應門外山見我蹇驢去冷
泠野水聲候子莊上路亦有東鄰僧分卧清寒處

留岳仲遠處欲歸賦

客懷迷積陰歸夢理前路篠岬散清漪秧疇生綠霧蚓
鳴沮洳夜鳩喚蒼茫曙我本江海人安得扁舟去

偕陸李道錢德鈞陸友元葉彥思張仲容飲府
庠荷花池上既而又自韓園至鄧覺非家飲觀
蓮分得色字韻

清樽如有期初涼意俱適肯來寂莫濱菡萏亦浮植陶
然轉乘興徑度一圃碧遙指城南家臨水更展席酒狂
易為仙風便香堪食空宇無能塵物我皆醉色誰言鬢

已秋始得痛飲力願將花上露為洗坐中客

題丁生所藏錢舜舉山水

寒溪深無魚扁舟小如履舉世相為浮更用一篙力畫
彼山中人憩此松下石

南墅散步

散策忘遠近看雲孤野夕履石冰礪喧緣岡松林黑紛
紛車輪後宛宛崎嶇迹矯身一延佇金彩罇西魄遐思
動盈抱百年會有息人生信少娛道心常自得山中樵

者歸舍南炊煙直焉知同歲暮亦有還鄉客

空心亭分韻得旭字

常建
題處

依微轉樵徑更上虞山麓閒尋昔人詩自悟禪房宿野
木蔭花氣幽潭得山綠日日空心亭山僧愛朝旭

浮圖山莊冬夜

山田得秋稔農家共欣欣里社競簫鼓吾生愧鋤耰
書歲云晏五十更無聞古今轉難通何能筋力勤緬茲
寤寐懷擁爐取微燠荒村雞鳴遠不知遙夜分可憐獨

轅車徑度長岡雲賣薪者誰子低回日寒昕曠望城中
塵天地方網緼

述懷二首

古道直如矢古心能斷金今人思古人寥落誰知音旭
日臨前除暄風散幽襟相彼好鳥鳴擇陰嘉樹林豈無
念朝飢漑之釜與顰大川無停波高山上嶽峯白髮何
由元寒暑日夜侵叔孫獨楚製莊生常越吟載歌行路
難歌闕意彌深

葺荷不用織采蓮尚可食芳時安可常秋風鳴撼撼美人明月璫青霓以為裳手攬北斗柄低昂挹天漿天漿解渴心下土何茫茫九牡閭闔開寸誠函綠章焉得飛仙術與陪鷺鶴翔所憂歲年駛敢畏道阻長啓戶辨夜色驅車遡晨光終然江海溼臨路空徬徨

表易

登開元寺閣觀浮海石佛

招提控城闔飛閣峙千尺白日轉焚楣朱霞覆檐隙升

高覽萬象目炫潛動魄天驚決潁懸地覺虛無闕閣中
兩金象竒姿斲山石當年浮巨海波汜來中國未聞積
水厚能負萬鈞力瞽俗昧元津至人示靈蹟區區拯世
心於道詎無益危坐覲隋唐浩劫一朝夕檻前飛鳥逝
戶外流水疾九衢冠蓋場浮埃浩如積車馬何時閒丹
梯展良覲

春日雪中

蕭齋聽寒雨出戶霰已集飛霙點砌銷綠苔稍沾溼紛

紛漸填委勢若包原隰冥觀陰陽妙欲張故先歛定知
陳茲下已有春風入

胡西軒道院竹石

靈石起微雲高篁嘯飛雨解襟散幽寂清心見琳宇道
人方燕坐碧鮮照巾履客來但對面莊視不得語如觀
溫伯雪目擊破千慮清風何方來泠然入窗戶羣籟起
虛谷衆妙會靈府飄飄紫鳳鳴蕭瑟驪虬舞伊予墮塵
網憧憧困馳騖神棲方外久夢繞雲卧屢永願繼壺公

終當效巢父

送潘鶴臞歸侍母

冉冉虞淵月迴光照我衣蕭蕭大隄馬送客長鳴嘶窮
冬霜雪繁陟岡行旅稀子何意浩蕩歸心如奮飛王粲
故鄉志江淹南浦悲丈夫各有適聚散焉可期子有白
頭親天寒守重閨蠨蛸懸牖戶知子行當歸舉觴慈顏
和升軒福履綏士生食萬鍾高堂色養違何如衡門下
菽水歡逶迤羨子敦懿義家聲良不虧閒居富詞藻札

翰時相貽

郭麟孫

遊虎邱

海峰何從來平地湧高嶺去城不七里幻此幽絕境芳
遊坐遲暮無物惜餘景樹暗雲巖深花落春寺靜野草
時有香風絮淡無影山行紛遊人金翠競馳騁朝來有
爽氣此意獨誰領我來極登覽妙靈應自省遙看青數
尖俯仰綠萬頃逃禪問點石試茗汲憨井意行忘步滑

野坐怯衣冷聊為無事飲頗覺清晝永藉草方醉眠松
風忽吹醒

黃庚

至後

道人坐茅宇獨抱無絃琴對此景物異夕雲散還陰雨
氣一簾潤雲意千山深新陽暢微暄疎花點孤林芳時
坐消歇孰同歲寒心孤梅發清夜庭樹驚棲禽

潘淑妃

二八入宮掖一笑輕三千雲階渺何許步步生金蓮繡
鞵不勝春風若凌波仙榮華一回首荊棘生我前君恩
花上露妾心井中泉井泉誓不波下照青青天

約王琴所不來舟中偶成

清飈卷炎埃碧水出秋素迢迢見山亭回首隔煙霧酒
帘颺漁邨笳鼓響軍戍倚篷問舟人云是三江路籬落
雞欲棲野水牛已渡釣翁吹荻煙稚子收漁具抱琴人
不來殘陽在高樹

種松

去年種松樹未有蒿與蓬今年松漸長埋沒蓬蒿中老
髯何蒼蒼歲華不改容回視蒿與蓬零落悲秋風

讀文相吟歎橐

垂垂大厦顛一木支無力精衛悲滄海銅駝化荊棘英
風傲几礧濱死猶鐵脊血灑沙場秋寒日亦為碧惟留
吟歎編千載光奕奕

王義山

書永嘉嘉禾驛

老來倦躋攀悠悠憩山側層巒軼穹霓紆縈困行客崖
傾覺嶮巖徑曲盤險迫石老枕雲根橋橫界野色海嶠
吞暝暉松標挂辰極殘煙罩成幄長波曳如帛天際鳥
知還溪澗魚自適幾忘物無我慮澹意常寂泛觀穹壤
間天亦局於迹榮華忽彫枯俛仰遽今昔傾義脩再旦
急軌等寄驛愚公果何為老且欲移石

劉邊

會仙巖

青山解隨人遠近互相對寒潭入陵谷龍去知何處歷
歷沙上石羣仙昔來會日暮一童歸橫吹卧牛背

仙船巖

仙舟等暮盪萬仞架雲表木石渾未分風雨能不朽恐
因堯年水艤棹寄巖竇猶勝夜壑藏有力莫負走奈何
苦海深忍袖慈航手我欲溯靈源乘槎問牛斗

茶竈

仙人足戲劇磐石留渦房紫陽此來遊與客煮茗嘗青
煙久消歇白雲時飛揚至今潭中水猶作笑語香蒙茸
履跡在欲步不敢翔三吸此清冷回首入空蒼

金履祥

遊三峰山

九月天氣清高颺掃虛碧山色日嶙峋山意亦寥閒有
來二三友勸我振雙屐問道始委蛇陟巘轉深密犖确
礙微徑藤蔓絆行色岡阜出陂陀重險更嶒嶸絕壁詫

天造石筍疑人立上上復攀援巍巍亦恂慄摩藓追舊
題捫蘿看新蹠徇僂度崎巖盤礴踞危石誰鑿丹臼深
碧瓦孰搏埴云胡半空中有此千載跡中峰函劒氣幽
洞飛靈液霏霏人間雨往往此中出陰崖採芝人東岡
並遊客虛谷遠應聲重崦近城隔而我獨油然振衣表
千尺川原一以眺蒼莽浩無息長風拂巾袂太清可噓
吸乃知艱險餘始有高明極益知身轉高冥然氣超逸
登天信有其昇仙豈無術何當躡飛煙高舉振長翮倒

景凌三光達觀天地窄

楊學文

梅花

朔風凍雲低雪意光林杪北枝寒無聲南枝香獨早縹
緲羽衣明的樂椒房小中有浩蕩春笑傲煙塵表美人
山店夜玉光破寒曉孤潔豈欲高羣芳自枯槁悠悠歲
寒心不為東風老乾坤萬壑冰一花已不少

劉堽

補史十忠詩

并序

詩以厚倫美化為本非曰諧俗寄情而已即千篇
奚益每思張許二顏同時死國名芳唐史與天長
存近代死節數公何媿往昔顧麥秀黍離無繇倣
柳州狀逸事上太史庶幾不朽竊以慨念更後幾
年遺老漸盡舊聞銷歇將無復知有斯人者悲夫
哀哉死臣子職分古人常事爾死矣寧顧其傳不
傳乃亦不可無傳者為其繫彝倫闢風教厲後代

之臣子媿前日之不如數公者也采清議得忠義
臣十人史不書各賦十韻纂其實曰補史詩

知潭州湖南安撫使李公

芾

三已甘退休十連起遲暮伊誰急求子流落乃不怒黑
雲來如山殺氣震平楚恭惟君父命封疆以身護闔門
義不辱呼卒汝善處飛魂隨劒光自己投火去天泣鬼
神愁地搖山岳仆吾非莒柱厲敢以死酬主正自常事
耳命義逃安所冲遠誰與儔睢陽有張許

吉悒字祖冲
丁穆字彥遠

皆晉
忠臣

池州通判權州事趙公

卯發昌州
人妻雍氏

若人作何狀立節乃殊偉人言此蜀珍位卑名未起坐
分秋浦月攝此千里寄沙頭風色惡寒城凜弘峙吾聞
開關迎棄遁亦復恥茲惟城郭臣大義我知己間道走
帛書灑血別玉季細君絕可人雙飛同一死南八彼男
兒此婦乃如此骨朽香不廢吾詩當青史

丞相都督信國公文公

天祥丙
辰狀元

時平輒棄置事迫甘前驅嗚呼忠義臣匪直科目儒江
寒朔吹急列城同一趨豈不寄便安綱常乃當扶移檄
倡諸鎮奮袂躬援枹川決莫我回萬險棲海隅天乎復
不濟道窮竟成俘一死事乃了吾頭任糝糊悠悠譏好
名責人無已夫三衢有魁相投老作尚書

三衢魁相
謂留夢炎

叅政行丞相事陸公

秀夫

天地無託足海天同隰光明知復何為不忍隳三綱裸
薦覬少延謳歌寧遠忘或者莒在齊聊且帝一方竭蹶

竟委頓臣謀非不臧運去天莫留力盡心彌強終不負
吾主名義天地長懷璽隨龍遊舉室水中央斯人文華
士乃爾百鍊鋼機雲儻通譜應羞朝洛陽

前左丞相江文忠公萬里弟

萬頃

匡廬雲錦屏鴻儒產其下風神儼如龍天矯莫可駕卷
懷經濟具婆娑洛中社怪事玉牀搖清晝天忽夜突騎
從何來陰風飄屋瓦大臣義有死欲避吾不暇庭前環
止水萬事付一捨從容友靈均朝野動悲吒愍章極哀

榮汗簡誰記者倘有南熏書季方足堪亞

江西制置司都統密公

侑

臣有置身義豈計官崇卑偏將知死忠不曰天下奇漢
節既披靡失位趨江西閫帳駐臨安招徠樂其歸雪寒
南浦愁羽檄斬濟師一將奮風虎鼓行亟颺馳踰嶺疾
戰苦裹瘡呼健兒坐縛膝不屈伏鎖甘如飴小臣裨校
耳職也宜死綏廬州大將在白首豎降旗

淮東制置使知揚州李公

庭芝

淮海接風塵胡乃似鐵壁卧護有天人十載藉福力重
來人未老愁絕事如昔苦戰孤城危痛哭天柱折夢遊
三山上人倫浮海出突圍志南征吾欲重建極天弗鑒
臣忠冥冥墮叢棘先軫面如生長弘血化碧臣死誰復
知臣忠終不易一將更大事嚼舌死罵敵

樞密閩廣宣撫使陳公

文龍戊辰狀元

淳熙名宰孫比德粹如玉決科魁偉英駸駸豸冠肅類
田煩諫疏相嗔俄嗾逐補郡仍免歸黃流已漫陸天族

日光薄力疾支顛覆蹉跎南冠繫道病死不辱往昔五
峰堂傾蓋語跋燭斯人真妙人哀哉慳厚祿長揖丙辰
魁各天並黃鵠不有二忠存千古笑科目

少傅樞密使張公

世傑

士有守節死豈以責武夫武夫尚能竒消得銀管書何
許熊虎英鐵面美髯鬚護寒久枕戈赴難甘捐軀金山
定活著志願嗟違初江心集羣策炎精回一噓間闕障
海濱萬死存趙孤時也可奈何北風散檣烏漂漂竟何

之無乃膏鯨魚渭濱多貴將反笑斯人迂

四川制置使知重慶府張公

珪

坤維拓提封形勝古天府血戰五十秋零落餘八柱江
南傳箭急誰暇此回顧落日古渝城杖鉞乃甚武天東
甌雖墮吾自強支拄渡瀘躬討逆歸來戰彌苦蕭條下
夔門機穽伏中路咄咄快敵仇誰與掩坏土哀哉關西
雄國亡猶不負同時督軍將腰金插雙虎

吳澄

錢王講師分韻得波字

夫君鸞鵠姿早蔭青青柯天風忽搖落匿影逃虞羅堂
堂少微翁闊視海一蠡閩山初識君有如歐得坡違離
十年餘契義矢靡他竭來漳江濱千里重經過青眼兩
熠燿白髮各擲抄朝飲共談諧夜燈對吟哦交情政爾
歡別意今如何謂有神官招道妙相縷覩去去不可留
船頭漾春波寅軒窗外月清夜照薜蘿頽然一翁老顧
影獨婆娑我欲丐賸馥亦復成蹉跎目極象山雲仙巖

岌嵯峨幸君勿我遺頻寄別後歌

談經次韻夏編修

六經在天下浩瀚若河漢東流竟日夜萬世資溉灌
遼哉去聖久原遠末益散競持郢書說孰別魯鼎贗
雞鶩物之微猶自了晨旦云胡有目人莫覩星宿爛
新安巨子出毫縷密分辨嗟予童而習弱質少勇悍
續綆鉤其深事倍功未半吾鄉有奇彥京國逞縱觀
顧予蘧夢中快甚湯液汗妙句發心聲嚴嚴氣魁岬
相期五色瓜剖

實得犀辦

送楊志行赴閩海照磨效其體

負疴出京華息擔憇江介解后玉雪姿乘陵塵囂外嘉
名昔屢聞良覲今一快談諧每欣豫晨夕數期會藉此
慰羈孤胡然倏離背天書下司臬海嶠備寮案陽烏方
赫曦驛騎促徂邁去矣君弗留懷哉我奚賴

江西秋闈分韻

并序

延祐四年秋江西府中書省欽奉天詔第二舉進

士典校文者七人或居千里外或居千里內一時
磨至來集於茲晨夕相親亦云樂矣其將別也能
無情乎乃九月九日開尊暢飲登樓遠眺秋意滿
目悠然興懷酒闌以日月依辰至舉俗愛其名為
韻各賦古詩一首爰記良辰會聚之樂且抒異日
離索之思焉

一天秋意滿淡泊散微霰羈棲滯公館朧朧忽已再佳
辰邁九日節物兩冥昧東籬黃花吐應笑我安在天網

罩羣髦驅使及我輩白袍蟻蜂聚黑字蛇蚓態居然三千牘負以幾牛背妍媸屬鏡鑑踳駁混鉛黛披條索其華掇擷紛瑣碎臨文費三思撫几時一嘅皇心天廣遠鴻澤海汪濊猗歟際休明光垢勇礪淬誰能日鋤耨沃衍有荒穢繼今獲小成力學期大耐異時國君臣彪炳麗昭代此中斷金侶清氣浮沆瀣繾綣膠漆情頡頏瑤佩忽謂歲華徂共希賢哲配道崇極所躋厚德重彌載臨別無媚言努力各自愛

姚燧

寄王憲使立夫

庭樹生秋風炎熾奪如失小蟲鳴嚶嚶高隼飛歛歛緬
懷素心人若髮未忘櫛百年能幾見過眼徂電疾而君
有官事出言千里律何暇喜楚音情與逃空一昨因趙
卿至戒遣書新述篇軸不害多無憚費紙筆且約來北
州罇酒留十日晴天逼佳夕共看華月出非不思餘論
門無一親即吾私如汲車已脫復縈綯晚菰生待種蚤

稻行可鉅少須黃花發秋風亦蕭瑟倒冠獨山巔茲遊
或能必

次韻閻子濟二首

吾友宋僉憲頗聞思湘中每云所遇奇未易言說窮崇
蘭春風花巖桂秋露叢三年一官內身在香國東朝航
汨羅波翻動海日紅暮揖嶽麓寺蒼煙樓觀霍喧喧名
都邑百貨聚商工何時訪君遊盡歷西南雄

霜水收風濤江船穩歸路唯應江間月照汝來往屢長

沙隔南雲尚飽艱險趣天涯念基錯睽闊皆舊故新知
苟會心何必懽有素黃鐘未懸業衆目齊瓦釜大音故
希聲欲說難至戶况我言毛輜誰復聽其句所恃君盛
年學仕猶未暮丈夫重道義自足輕外驚觀今紛華儔
愠喜隨一芋願終藏山書榮於鹿眠賦

盧摯

行農洛西題王居仁山堂春曉

幽人持所見曠然捐世故豈薄軒冕榮正有林壑趣興

居惟自適早晏常暇豫草芳澤氣春鳥鳴嵐光曙巖花
抗韶容溪雲澹吾慮圖史敦夙好朋遊非外慕招邀具
雞黍笑言在農務我來忝符竹行田課耕助撫卷懷清
風長吟山郭暮

寄博士蕭徵君維斗

秦中幽勝地乃在終南山磐石負磊磊清泉散潺潺侶
侶古君子疊疊泉石間圖史紛座隅衡門晝長關種菊
餐落英襲芳佩秋蘭道腴德充符怡然有餘歡鳴鶴時

一來似愛孤雲閒孤雲不能飛鳴鶴遂空還
澌澌桃李艷鬱鬱松柏寒羲和駛春暉歲晏霜露繁感物有深微
懷哉邈難攀

載酒訪王敬仲昆季登樓賦詩得見字

城南有幽人旬浹不獲見駕言寫我憂况懷青雲彥寒
潭照林廬高樓俯郊甸偶持一觴酒相與言笑宴農畝
方委積庭柯謝紛絢空山歲年晚聊以觀物變此日足
可惜攜手盡餘暉

席上荅周饒州

美人如脩竹日暮何娟娟美人如野鶴所貴非乘軒
遠遊豈不佳緇衣為誰賢相別亦云久相看已蒼然襟韻
尚豪爽尊俎重流連追憶平生歡見贈長者言鏗錡咸
池奏滢渺渤澥淵我無英瓊瑤持以贈君筵為君賦淇
澳為君歌芝田

石鏡精舍

時暇陟林臯聊訪塵外迹禪巖瑩靈輝於茲鑑空寂看

筍出深樾聽泉憩危石勝踐已云屢誰能憚行役

送李廉使西歸洛陽

靡靡歲年晚肅肅霜露霏君子不遑處四牡來駢駢
出方皎皎我心恒依依今夕復何夕山中依容輝惠然
有深契使我心悅夷北風日以涼行役乃無期言邁未
可留悽然送將歸永懷金玉音時得慰渴飢

贈陝西李廉使古意二首

威鳳覽德輝來自丹穴山孤鶴慕文采飛從浙江干鳳

飲必醴泉啄食唯琅玕
簫韶奏虞廷鳳儀五雲間
朝陽忽西馳梧竹隨凋殘
孤鶴黯秋影雁鷺相與還
長鳴九皋恨月落天風寒

娟娟秦闕月偏照松山雲
山雲自無心而能遠縑塵
松雲初未閒下有幽棲人
瞠瞠風雨交悠悠去來頻
時時宿簷端姿態如相親
悲鳴動遙夜天衢屏遊氛
秦關漫修阻月輝皓無垠
願言奮西飛奈此由東鄰

春晚歛郡高齋

憑高得華構燕坐臨此州偶來稅塵鞅得與靜者遊
毗俗仍楚越城居帶林邱川明雲物閒風喧鳥聲幽羣峰
舉自獻春溪亦爭流餘花殿芳序春苗綠平疇臨觴詎
能飲對時思悠悠將指訪凋瘵摩撫庶有瘳曠職固所
虞永日聊淹留

宣城南郊何氏遊集

懷疴苦無悰撫節驚歲暮淹留屬休告寧復嬰物務幽
人偶相賞蕭散隨所遇寒郊聯騎出崇岡時延佇山家

如可即雞犬隔煙霧舉鞭問樵丁始識林下路亭榭歛
軒敞巖壑鬱盤互主人能愛客何必論雅素濁醪散襟
顏池鮮足供具雖非窮勝踐政自得野趣日夕歸影亂
嵐霏襲衣裾鳴騶慎毋前悠然望江樹

陳孚

夜泊六和塔下

碧天如幕垂露濕星磊磊漁燈射寒沙萬點亂光彩壯
哉大江水浩浩東北匯西風卷潮來鐵馬擁萬鎧木落

煙嶂橫鴟夷魂安在卧聞黃帽郎一曲歌歎乃扣舷起
和之逸興渺雲海

飛來峰

寒峰插天出玲瓏萬箇苔微風起松際怪石勢搖撼上
有百尺松幽花綴紅糝野猿忽躍去滴下數千點回首
冷泉亭天鏡光潋潋游姬長眉青嬌童兩髦髡平生山
水癖如人嗜昌歎對此一壺酒玉色翻醉臉路逢老祝
髮絳袍金光閃茲山信自佳恨為緇塵染置之且復醉

天竺鼓統統

甌社湖遇大風

天低煙冥冥平湖繞淮楚一帆東南來乃為風伯侮
前如殘葉飄後如輕蝶舞驚濤湧雪山濕浪濺銀雨
嘗聞貝宮胎夜夜靈光吐吾無盜睡心龍兮爾何怒
舟師倚斷桅相戒不得語亦有誦呪者拱手面如土
回視天際雁萬點落遠浦彼物何悠悠吾生浪自苦

徐州

項王熊豹姿氣欲吞天下大呼渡江來山岳如解瓦當
其火秦宮血湧渭水赭瞋目叱諸侯膽落毛髮灑誰知
陰陵路浩歌淚如瀉惟徐乃故都昔此奠宗社尚想巍
臺上鐵犁擁萬馬酒酣笳鼓鳴旌旗蔽原野及今亦何
有荒棘秋滿把皇天祚真主神器不可假豈有時雨師
刈人如土苴天亡君勿悲為君奠壘罍

百步洪

大山如飛虯小山如伏牛天河橫空來聲撼山骨浮我

偶石上眠夢驚霹靂怒急起扶瘦筇恐山亦流去

過臨洛驛大雨雪寒甚

弭節發襄國飲馬清洛水山冰忽陰沍急雪白玼玼北
風利如矛翦翦射雙耳飢烏時一鳴僕夫寒墮指平生
三間茅豈不願田里天子命有行去去何敢已道傍有
旗亭濕煙亂汀葦尚想布衾衣晏眠猶未起

黃州黃陂驛

晨發定邊驛千崖紅櫟林午度大勝關萬壑青松陰寒

泉寫澎湃亂石懸嵌崿走野鹿角角鳴山禽平生
一兩屐若有山水淫天台雁蕩路坐對清猿吟竭來擁
使節躍馬聲駸駸誰知長淮上風露凝衣襟黃州渺何
處雪堂蒼煙深因思蘇長公幅巾霜滿簪洞簫起月下
天地皆清音千載豈云遠知我猶此心

出健德門赴上都分院

北樓急鼓絕南樓踈鐘鳴盥櫛未及竟騶官戒晨征三
年去鄉井已覺身飄零今朝別此去又有千里行懷君

豈不願王命各有程小車如雞栖軋軋不得停出門見
居庸萬仞參天青鄰家三數嫗對我清淚傾問我善飯
否慮我衣裘輕大笑揮之去我豈兒女情

懷來縣

榆林青茫茫塞煙三十里忽聞雞犬聲見此千家市石
橋百尺橫其下跨媯水人言古媯州殘城無乃是民家
坐土牀嬉笑圍老稚糲飯侑山蔥勸客顏有喜足跡半
天下愛此俗淳美醉就軟莎眠夢游葛天氏

李老峪聞杜鵑呈應奉馮昂霄

三月十九日客行桑乾坂杜鵑啼一聲清淚悽以潸故
園渺何處萬里隔雲巘燕子三見歸我車猶未返杜鵑
爾何來弔我萬里遠同行二三子相顧一笑莞問我此
何鳥怪我苦悲惋掉頭不復言日落千山晚

李陵臺約應奉馮昂霄同賦

落日悲笳鳴陰風起千嶂何處見長安夜夜倚天望臣
家羽林中三世漢飛將尚想甘泉宮虎賁擁仙仗臣豈

負朝廷忠義夙所尚
漢天青茫茫萬里隔
亭障可望不可到
血淚墮汪洋空有臺上石
至今尚西向

瀟湘八景

洞庭秋月

月明水無痕
冷光泣清露
微風一披拂
金影散無數
天地青茫茫
白者獨有鷺
鷺去月不搖
一鏡湛如故

煙寺晚鐘

山深不見寺
藤陰鎖脩竹
忽聞疎鐘聲
白雲滿空谷
老

僧汲水歸松露墮衣綠鐘殘寺門掩山鳥自爭宿

江天暮雪

長空卷玉花汀洲白浩浩雁影不復見千崖暮如曉漁
翁寒欲歸不記巴陵道坐睡船自流雲深一蓑小

瀟湘夜雨

昭潭黑雲起橘洲風卷沙亂雨灑篷急驚墮檣上鴉鼃
鼃互出沒暗浪鳴艣牙漁燈半明滅濕光穿蘆花

平沙落雁

十里黃晶熒菰蒲映原隰亂鴻忽何來影墜西風急嘹
唳三數行欲起又飛立水寒夜無人離離爪痕濕

遠浦歸帆

日落牛羊歸渡頭動津鼓煙昏不見人隱隱數聲櫓水
波忽驚搖大魚亂跳舞北風一何勁帆飛過南浦

山市晴嵐

茅屋八九家小橋跨流水市上何所有寒蒲縛江鯉犬
吠樵翁歸家家釜煙起共喜宿雨收霞明亂山紫

漁村返照

雨來湘山昏雨過湘水滿夕陽一縷紅醉眠草茵暖漁
罾曬石上腥風吹不斷野鳬沈更浮沙汀荻芽短

馮子振

題鈕處士隱居

太湖光爛銀日上炫朝彩幽人住此中浩蕩增蟲嵬亦
有千林橘柯葉霜不改仙翁留丹竈五色精璀璨我欲
從之游芝田為君采

高克恭

至正己亥四月廿二日宿翠峰禪室登留雲閣
數日與淨蓮公

米老天機清夢入煙雲
窟山河大地影玻瓈
鏡中出任
自選勝場莫浪翻墨汁
今于西湖濱割取南半
鐸

鮮于樞

戊午十二月十二日別家

元冬尚閉藏
游子戒遠塗
出門少人跡
霜露濡衣裾
強

顏辭老親低首戀蓬廬牽舟逆北風墮指哀僕夫十年
賦倦遊卜築滄海隅既無官守責亦作飢寒驅宴坐固
所懷復此畏簡書仰慚隨陽雁俯羨在藻魚

過桐廬漏港灘示舟人

驚流激長灘百折怒未已篙師與水爭退尺進纔咫尺
窮解衣下力排過乃止維時春冬交冰雪寒墮指我時
卧舟中起視顙有泚迂踈一何補辛苦媿舟子

百步洪

濫瀕三蜀險呂梁天下壯我昔過彭門舍舟步青嶂醜
酒神龍祠凜乎不敢嚮間關一葉下號呼百人放篙師
稍失律身入魚腸葬至今僕夫輩言之氣輒喪危哉石
梁洪勢與呂梁抗一石截中流兩山東驚浪雷霆怒轟
訇魚龍氣慄愴輕船汎順風大艦劈秋浪我行有期程
稽留速官謗慙愧雙白鷗飄然凌滄漾

周馳

耕雲鋤月寄貞居

買山靈山下石多如羊羣造物為我耕種之皆白雲洶湧初鬱勃散漫還氤氲收歸方寸間吐作五色紋一笑顧妻子未用愁空困

石田不生禾何以養吾拙中宵披白雲自起鋤明月明月無根株滿地散霜雪吾鋤不妄揮要使蕭艾別惜無植杖翁相對同此潔

季札廟

古人不可及冥晦秉淳德一動成功名煥爛照無極季

子賢大夫劔佩游上國微乎禮樂意洞達有精識迄今
二千年欲繼難再得我行故城闐寂寞弔遺跡廟古丹
雘漫階空苔蘚積翔禽集中雷懸網挂虛壁鄉人尚加
敬瞻仰自夙昔歲時脩饋祀塵土走巫覡吾徒志為學
不肯競朝夕景暮將何如江海起涓滴

張伯淳

延祥餞夢符行

古交重氣誼不為勢位隔會少別離多志士深所惜驄

馬東南來來暮去何亟留連苦無計杯酒聊永日絕嫌
城市喧一舸訪荒寂孤山芳意歇青子漸堪摘淒淒風
雨橫黯黯楊柳碧天公豈有意助我動秋色重來定何
時慰此長相憶

題董承旨野莊圖

古人志道義但覺利祿輕朝市亦足隱何必求郊垞論
心不論迹乃稱人物評董公廊廟器一門富簪纓石張
漢世胄崔郭唐家聲筆下翻波瀾胸中韜甲兵黃閣政

柄舉烏臺公道行征謀與治法和氣與威稜隨施無不
宜因物以賦形詞林日月間班高地望清公餘掃俗軌
窗草階苔青樓臺雖無地詩禮勝金籟田園雖荒薄松
菊還欣榮有時論國事瞻張目增明使公遯江湖秉心
亦朝廷所志真在隱非必身歸耕野莊視綠野他年定
齊名

陳思濟

題趙德輝宣慰代友人償債卷

人以利為利利等邱山高能以義為利其利輕鴻毛偉
哉趙使君重義輕幣刀周急乃君子而況同氣交交游
負宿債代償曾不勞錐刀抵死競紛紛笑兒曹義風久
不作千載空寥寥佳聲足傳播復有御史謠余時亦安
用但續金之貂尚願君侯心推之及蓬蒿又願君侯位
鈞衡早持操躋民富壽域永永無逋逃

湯炳龍

湖上觀春

閉門五日雨出門萬山春湖光忽見我搖蕩白雲新九
節瘦筇杖一幅故篇中桃花忽相笑聊復此紅塵有錢
困鞭筭有官繫卯申洞然宇宙間餘此自在身但恨不
能飲我亦無事人

盛如梓

遊集仙宮

紺宇出闌闌來遊慕虛寂流水環四圍入門杉檜碧長
廊煙霧生靈貺幡幢密主人聞客至尊酒延丈室脩竹

逾萬个老桂高百尺
日色淨不暄松風涼可挹
翛然人間世陡覺詩興逸

戴天錫

題高尚書夜山圖

風露百尺樓湖海兩奇士
山空宵月滿寥落非城市
明浙河西宛宛豪素裏德人與天游
恢廓應如此

張復亨

題高尚書夜山圖

畫山畫易工畫山夜難狀高侯江海姿落筆勢雄放毫
茫見神工超忽移物象越岡遞起伏浙水尤滉漾初看
浪如山却訝山似浪簸蕩煙月間未數溟島壯茲圖歟
流傳披展神為王何當就謫仙一醉秋閣上

題子昂墨梅圖

皎皎姑射姿寒香淡孤月歲暮耿幽貞江空照竒絕何
處碧參差吹落南枝雪因之托豪素夜半清輝發一洗
京洛塵芳菲不堪折跼蹐坐消憂何待清尊竭

御選元詩卷十三

謹案第九頁後三行題山外歸人刊本歸訛婦據

別本元詩改



總校官庶吉士臣侍朝

校對官檢討臣蕭九成

膳錄監生臣周元

欽定四庫全書薈要

集部

御選元詩卷十四



詳校官原任主事臣李斯咏

欽定四庫全書薈要卷一萬八千四百二十六

非部

御選元詩卷十四

五言古詩三

黃宏

過天姥嶺

天姥連天橫我過如牛脊
乃知李謫仙夢遊言過實
徐生亦好奇請問劉阮迹
安知古仙人太平入鬼域
妖狐花滿頭媚人強求匹
流杯飲胡麻磊塊皆沙礫

安熙

擬古次韻六首

鬱鬱巖下柏青青水中蒲巖前有幽人壯歲常獨居獨
居亦何為不羨春華敷十年掩關卧門庭盡荒蕪美人
殊不來日夕聽軒車

零零白露下巖谷悴芳蘭蘭悴不復辭誰與念時艱堅
冰行復至雪深路漫漫愁絕將奈何撫几一長歎

中州有寒士塊然守空堂清貧久有信壯懷殊未央豈

不願馳騁冒雪凌風霜振策萬里途
忽追鵬翔永念同懷人渺在天一
方悵望不可見慷慨發清商獨處誰
晤語百感摧中腸人生諒難必且莫
徒悲傷

採柏空巖下倚竹荒庭前人生非金
石君心詎能堅君心或有渝賤妾終
不疏天地一瞬息今古一長途借問
離別苦君心竟焉如不見園中樹日
日爭華敷秋風一夕至已逐嚴霜枯
歲晚不得去山空難久居

崑崙一何高出此無窮河遙遙何所
往不啻萬里多一

意在朝東日夕無停波遠遊計不蚤壯志成蹉跎夫君
不我顧鬱鬱將如何覽物悟物變端居閱年華興來展
遐眺緩步空山阿四顧渺塵世杉柏紛森羅吾樂誠何
極憂子獨長嗟眷焉誰晤語一笑空烟蘿

人生有定分所貴能樂天自輕失所守欲進安敢前思
君重思君此情誰與宣舉頭見明月顧影徒自憐終當
謝塵世洗心聞澗泉

病卧窮廬時詠靜修仙翁和陶詩以自適輒效

其體和詠貧士七篇非敢追述前賢聊以遣興

云爾 錄二首

士生三季後，俛俛渺何依。
空餘身後名，炯炯留清輝。
自古有商顏，冥鴻快高飛。
白雲在空谷，哀歌歎安歸。
雖無首陽薇，紫芝足療飢。
九原不可作，撫已良可悲。

靜中有真趣，非絃亦非琴。
耿耿方寸間，千年有遺音。
手植庭下蘭，奇香恆幽尋。
獨處誰晤語，有酒還自斟。
西山薇蕨多，長往夙所欽。
塵迹尚淹留，低回愧初心。

封龍十詠

錄四首

熊耳峰

高五百丈摩雲插漢峭
出羣峰山之極高峰也

窮探不憚遠行登最高峰頓覺天宇近一洗羣山空奇
哉此絕境造化天無功神襟一以曠寫我浩蕩胸遠意
殊未極更思脫樊籠何當著神鞭駕此慵飛龍翩翩上
箕尾再見開鴻濛長嘯暮雲合輕衣振天風

白雲洞

在獅子峯後華蓋峯西天欲
雨則雲從洞出霽則如歸焉

峩峩兩峯間崔嵬聳雙闕中有仙人洞恍若仇池穴朝

開白雲生暮掩白雲滅朝昏有奇變宛與人世隔我來
蹇綠蘿深尋得幽絕平生棲遁志茲焉益超越未成長
往計復愧固窮節永懷靜修銘淒其仰前哲會當結茅
屋來此寄疎拙沈思畢舊聞長歌抱明月白雲應更深
老眼益清徹未敢獻吾君聊爾自怡悅

修真道館

在獅峯下中央平坦泉石甚盛宋政和中賜勅額迄今殿宇猶為山

中之冠

龍山古靈境連峯鬱蒼蒼林谷四環合修真據其陽怪

石通流泉洞府餘清涼傑閣聳奇觀煙霏恣微茫眷予
平生心丘壑真膏肓今朝定何朝遂愜棲雲房晴嵐染
衣襟頓覺塵慮忘矧爾羸疾拘快若脫繫韁月高風露
清空明渺銀潢蓬萊信非遠何處求仙鄉

吟臺

在中溪書院宋初李文正公昉於此受業

步上吟臺荒極目但平楚四顧渺無人持杯欲誰語心
期反招隱自笑非梁父抱膝一長歌商聲振林莽

于石

山中二首

我家萬山中日日採樵去捫蘿上層巔苔滑不留履落
日負樵歸雲深失歸路誰家犬吠聲聲在雲深處

偶因抱甕出夜汲澗底泉蕩搖水中月水定光復圓問
水水不語問月月不言倚樹一長嘯萬壑松風寒

晚步

徑狹不容車谿淺不容釣平蕪淡雲煙獨鳥下殘照見
山了無言倚樹忽長嘯徘徊澹忘歸空林明遠曉

宿棲真院分韻得獨字

空翠冷滴衣石蘚滑吾足偶隨白雲去棲此林下屋樓
影挂斜陽鐘聲出深竹山僧老面壁誰與伴幽獨分我
雲半間欹枕聽飛瀑

探梅分韻得香字

絕壁兩屨雲荒邨半橋霜孤往欲何之林下幽徑長寒
梅在何許臨風幾徜徉誰家斷籬外一枝寄林塘水靜
不搖影竹深難護香無言獨倚樹山空月荒涼

所懷寄何寺簿

斜日明遠樹落葉走空堦
閉門寂無事心澹境自佳
美人期不來此樂誰與偕
豈無南飛雁可以寄所懷
所懷不可寄孤雲渺天涯

七月七日

西風掃殘暑微月澹新秋
相傳織女星今夕嫁牽牛
翩翾鵲橋亭亭擁龍輶
多少乞巧人笑語穿針樓
吾嘗夜觀象細與推其由
惟有五緯星順逆有去留
經星二

十八歷歷如綴旒萬古儼不動各列十二州其餘衆常
星爛然滿四周休咎必有證君德修不修胡為牛與女
不與衆星侔乃知塵世人配偶相綢繆少陵號詩史萬
象窮冥搜亦云年年渡秋期何用愁彼哉柳河東抱拙
不自謀傍趨事曲折竊效兒女求誰與倡邪說誕謾不
復收淫褻轉相襲寢使其辭浮仙槎儻可乘我欲凌空
遊再拜二星靈一洗千古羞天高不可問河漢空西流

我從山中遊

我從山中遊歸來林壑暝澗水凍不流月出四山靜柴扉不敢敲恐驚孤鶴醒徘徊踏月明倚杖看松影

再遊石壁寺

曾為石壁遊更借僧房宿樓閣倚林霅谿山醒塵目敲門尋舊僧清響應林谷老僧不厭客分我雲半屋禪月豈後身尚餘詩滿腹疑我亦荀鶴再與賦漢牧汲井晝煮茶洗鉢夜分粥山空人語寂邀我入深竹獨抱無絃琴不唱浮生曲月樹影參差風灘聲斷續條然出塵表

身世轉幽獨明朝出山去無言笑相矚江上石牛眠秋
草為誰綠

何失

招賈元播馬德昌飲

積雨釋炎熱涼颼變清商薄帷納朝景倏爾頽西廂念
我二三子不來復一觴言笑吐蘭菊芬芳粲中堂仰慕
不昨日忽別若殊方況各迫桑榆何以永夕光

招暢純甫飲

地白雪方作城烏夜始啼風枝久不定達曙未能棲長
安多逆旅客意勢連雞豈不懷其實念子寒與飢我甕
酒初熟葡萄漲玻璃野老日無事出望幾千回如何不
見來覆此紅螺杯

趙孟頫

和子俊感秋二首

明月照北林翩翩棲鳥翻虛室當靜夜幸絕人事喧念
子已獨寐無人相語言吾生性坦率與世無競奔空懷

丘壑志耿耿固常存何由持此意往與嚴鄭論

白露泫然墜草木日以彫閒居無塵雜日薄風脩脩登高寫我心葵扇欲罷搖感時俯逝水回睇仰層霄松喬在何許高蹈不可招願言從之遊懷古一何遙

歲暮和剛父雜詩二首

驚飈吹白日流光忽蹉跎登山采衆芳荆蓀一何多迷途幸未遠迴車且委蛇黃鵠志四海雀鷄將如何

肥馬黃金鞍輕裘華且鮮竭來從橫馳意氣何翩翩朝

為人所慕夕已為世憐此道固應爾禍福非虛言生當
稱善人死當謚為賢勿羨夸毗子狂馳終百年

東郊

晨興理孤榜薄言東郊遊清風吹我衣入袂寒颼颼幽
花媚時節弱蔣依寒流山開碧雲斂日出白煙收曠望
得所懷欣然消我憂中流望城郭葱葱佳氣稠人生亦
已繁惠養要須周約身不願餘尚恐乏所求且當置勿
念乘化終歸休

趙邨道中

朝出南郭門遙指西山陰馬蹄與石鬪宛轉愁我心溪
谷莽回互寒風振穹林黃葉灑我衣巖泉走哀音淒淒
霜露降窮思浩難任人生亦何為百年成古今華堂昔
燕處零落歸丘岑況復不得保悲來淚沾襟

奉酬戴帥初架閣見贈

仙人海上來遺我珊瑚鉤晶光奪凡目奇采耀九州自
吾得此寶晝玩夜不休生世勿恨晚及與斯人儔惜哉

無瓊玖可以結綢繆世德日下衰古風向誰求蛾眉亦
何有空受衆女仇適俗固所願違已良足憂感子贈言
意再拜涕泣流安得騎麒麟從子以遠遊

桐廬道中

歷歷山水郡行行襟抱清兩崖東滄江扁舟此宵征卧
聞灘聲壯起見渚煙橫西風林木淨落日沙水明高旻
衆星出東嶺素月生舟子櫂歌發含詞感人情人情苦
不遠東山有遺聲豈不懷燕居簡書趣期程優游恐不

免驅馳竟何成我生悠悠者何日遂歸耕

張詹事遂初亭

青山繚神京佳氣溢芳甸林亭去天咫萬狀爭自獻年
多嘉木合春晚餘花殿雕闌留戲蝶藻井語嬌燕退食
鳴玉珂友于此終宴鐘鼓樂清時衣冠集羣彥朝市塵
不侵圖書味方遠紛華雖在眼道勝安用戰初心良已
遂雅志由此見何事江海人山林未如願

禱雨龍洞山

蒼山如犬牙細路入深谷絕壁千餘仞上有凌雲木陰
崖不受日洞穴自成屋蕭森人跡少蒼蔚獸攸伏雲林
互隱映澗道相迴復翔禽薄穹霄鳴鳥響巖曲臨橋濯
清颼汲井漱寒玉神物此淵潛愆陽有祈祝風漓慙善
教吏懦恥厚祿暫懷塵外想獨往疑有桔過幽難久居
濟勝乏高躅策馬尋故蹊歸樵相追逐

題歸去來圖

生世各有時出處非偶然淵明賦歸來佳處未易言後

人多慕之效顰惑蚩妍終然不能去俯仰塵埃間斯人
真有道名與日月懸青松卓然操黃華霜中鮮棄官亦
易耳忍窮北窓眠撫卷常三歎世久無此賢

題耕織圖二十四首奉懿旨撰

田家重元日置酒會鄰里大小易新衣相戒未明起老
翁年已邁含笑弄孫子老嫗惠且慈白髮被兩耳杯盤
且羅列飲食致甘旨相呼團樂坐聊慰衰暮齒田饒藉
人力糞壤要鋤理新歲不敢閒農事自茲始

正月

東風吹原野地凍亦已消早覺農事動荷鋤過相招遲
遲朝日上炊煙出林梢土膏脉既起良耜利若刀高低
徧翻壅宿草不待燒幼婦頗能家井臼常自操散灰緣
舊俗門逕環周遭所冀歲有成殷勤在今朝

二月

良農知土性肥瘠有不同時至萬物生芽藥由地中秉
耒向畝畝忽徧西與東舉家往于田勞瘁在爾農春雨
及時降被野何濛濛乘茲各希種庶望西成功培根利
秋實仰天望年豐但使陰陽和自然倉廩充

三月

孟夏土加潤苗生無近遠漫漫冒淺陂
芄芃被長阪嘉穀雖已植惡草亦滋蔓
君子與小人並處必為患朝朝荷鋤往
薅耨忘疲倦旦隨鳥雀起歸與牛羊晚
有婦念將飢過午可無飯一飽不易得
念此獨長歎

四月

仲夏苦雨乾二麥先後熟南風吹隴畝
惠氣散清淑是為農夫慶所望實其腹
酤酒醉比鄰語笑聲滿屋紛然收穫罷
高廩起相屬有周成王業后稷播百穀
皇天貽來牟長世自茲卜願言仍歲稔
四海盡蒙福

五月

當晝耘水田農夫亦良苦赤日背欲裂白汗灑如雨
畝行水中泥淖及胷脊新苗抽利劒割膚何痛楚夫耘
婦當饁奔走及亭午無時暫休息不得避炎暑誰憐萬
民食粒粒非易取願陳知稼穡無逸傳自古

六月

大火既西流涼風日淒厲古人重稼穡力田在匪懈郊
行省農事禾黍何旆旆碾以他山石玉粒使人愛大祀
須粢盛一一稽古制是為五穀長異彼稊與稗炊之香
且美可用享上帝豈惟足食人一飽有所待

七月

白露下百草莖葉日紛委是時禾黍登充積徧都鄙在
郊既千庾入邑復萬軌人言田家樂此樂誰可比租賦
以輸官所餘足儲峙不然風雪至凍餒及妻子優游茅
簷下庶可以卒歲太平原有象治世乃如此

八月

大家饒米麵何啻百室盈縱復人力多舂磨常不停激
水轉大輪磴碾亦易成古人有機智用之可厚生朝出
連百車暮入還滿庭勾稽數多寡必假布算精小人好
爭利晝夜心營營君子貴知足知足萬慮輕

九月

孟冬農事畢穀粟既已藏彌望四野空藁秸亦在場朝廷政方理庶事和陰陽所以頻歲登不憂旱與蝗置酒燕鄉里尊老列上行肴羞不厭多魚羔復烹羊縱飲窮日夕為樂殊未央禱天祝聖人萬年長壽昌

十月

農家值豐年樂事日熙熙黑黍可釀酒在牢羊豕肥東鄰有一女西鄰有一兒兒年十五六女大亦可笄財禮不求備多少取隨宜冬前與冬後昏嫁利此時但願子孫多門戶可扶持女當力蠶桑男當力耘耔

十一月

一日不力作一日食不足慘淡歲云暮風雪入破屋老
農氣力衰偃僂胛背曲索絢民事急晝夜互相續飯牛
欲牛肥芟藁亦預蓄蹇驢雖劣弱挽車致百斛農家極
勞苦歲豈恒稔熟能知稼穡艱天下自蒙福

十二月

右耕

正月新獻歲最先理農器女工並時興蠶室臨期治初
陽力未勝早春尚寒氣窗戶當與密勿使風雨至田疇
耕耨動敢不修耒耜經冬牛力弱相戒勤飯飼萬事非

預備倉卒恐不易田家亦良苦舍此復何計

正月

仲春凍初解陽氣方滿盈旭日照原野萬物皆欣榮是
時可種桑插地易抽萌列樹遍阡陌東西各縱橫豈惟
籬落間採葉憚遠行大哉皇元化四海無交兵種桑日
已廣彌望綠雲平匪惟錦綺謀祇以厚民生

二月

三月蠶始生纖細如牛毛婉孌閨中女素手握金刀切
葉以飼之攤紙散周遭庭樹鳴黃鳥發聲和且嬌蠶飢
當採桑何暇事遊遨田時人力少丈夫方種苗相將挽

長條盈筐不終朝數口望無寒敢辭終歲勞

三月

四月夏氣清蠶大已屬眠高首何昂昂蛾眉復娟娟不
憂桑葉少遍野如綠煙相呼攜筐去迢遞立遠阡梯空
伐條枚葉上露未乾蠶飢當早歸秉心靜以專飭躬修
婦事黽勉當盛年救忙多女伴笑語方喧然

四月

五月夏以半谷鶯先弄晨老蠶成雪繭吐絲亂紛紜伐
葦作曲薄束縛齊榛榛黃者黃如金白者白如銀爛然
滿筐筐愛此顏色新欣欣舉家喜稍慰經時勤有客過

相問笑聲聞四鄰論功何所歸再拜謝蠶神

五月

釜下燒桑柴取繭投釜中纖纖女兒手抽絲疾如風田
家五六月綠樹陰相蒙但聞繰車響遠接村西東旬日
可經絹弗憂杼軸空婦人能蠶桑家道當不窮更望時
雨足二麥亦稍豐酤酒田家飲醉倒嫗與翁

六月

七月暑尚熾長日弄機杼頭蓬不暇梳揮手汗如雨
嚶時鳥鳴灼灼紅榴吐何心娛耳目往來忘偃僂織為
機中素老幼要紉補青燈照夜梭蟋蟀窗外語辛勤亦

何有身體衣幾縷嫁為田家婦終歲服勞苦

七月

池水何洋洋漚麻水中央數日庶可取引過兩手長織
絹能幾時織布已復忙依依小兒女歲晚歎無裳布襦
不掩脛念之熱中腸朝緝滿一籃暮緝滿一筐行看機
中布計日漸可量我衣苟已成不憂天早霜

八月

季秋霜露降凜凜寒氣生是月當授衣有布織未成天
家催刀尺機杼可無營教女學紡纆舉足疾且輕舍南
與舍北嘒嘒聞車聲通都富豪家華屋貯娉婷被服雜

羅綺五色相間明聽說賀家女惻然當動情

九月

豐年禾黍登農心稍逸樂小兒漸長大終歲荷鋤鑿目
不識一字每念心作惡東鄰方迎師收拾令上學後月
日南至相賀因舊俗為女裁新衣修短巧量度龜手事
塞向庶禦北風虐人生真可歎至老長力作

十月

冬至陽來復草木潛滋萌君子重其然吾道自此亨父
母坐堂上子孫列前榮再拜稱上壽所願百福并人生
屬明時四海方太平民無札瘥者厚澤敷羣情衣食苟

給足禮義自此生願言興學校庶幾教化成

十一月

忽忽歲將盡人事可稍休寒風吹桑林日夕聲颼颼牆
南地不凍墾掘為坑溝斫桑埋其中明年芽早抽是月
浴蠶種自古相傳流蠶出易脫殼絲纈亦倍收及時不
努力知有來歲不手凍不足惜冀免號寒憂

十二月

右織

次韻周公謹見贈

池魚思故淵檻獸念舊藪官曹困窘東郊入常盡酉簡

書督期會何用傳不朽十年從世故塵土滿衣袖歸來
忽相見忘此離別久緬想德翁隱坐羨沮溺耦新詩使
我和曠里忘已醜平生知我者頗亦似公否山林期晚
歲雞黍共尊酒却笑桓公言淒然漢南柳

新秋

夜久不能寐坐來秋意濃露涼催蟋蟀月白澹芙蓉漸
覺練衣薄欲將紈扇慵

慶壽僧舍即事

白雨映青松蕭颺灑朱閣稍覺暑氣銷微涼度疎箔客
居秋寺古心跡俱寂莫夕蟲鳴階砌孤螢炯叢薄展轉
懷故鄉時聞風鳴鐸

清河道中

揚舲清河流開篷素秋曉欄斑被厓花委蛇順流藻天
清去雁高野闊行人小故園歸有期客愁淨如埽

七月六日承貞居先生遠寄周鐘銑間有文象
鳧之形則考工記所謂鳧氏為鐘者也擊之與

夷則合而是日又適立秋古物之來豈偶然哉
輒成小詩拜貺之辱

故人賞我趣遺我鳧氏鐘制與周禮合試叩聲春容是
日新秋節夷則還為宮懸之西楣下浮磬儼在東金石
互相應間以絲與桐八音雖未備古樂將無同鼎尊鐸
解卣羅列見古風揖讓於其間令我懷周公作詩報嘉
貺庶以開羣聾

詠逸民九首

驅車秣駕馬吾將適齊國聞有魯連子倜儻好奇畫一
談秦師走再說聊城拔功成不受賞高舉振六翮布衣
終其身豈復為世役茫茫千載遠安往訪遺跡躊躇東
海上向風長太息

四時相代謝榮耀何足恃瓜田引新蔓不見桃與李知
士解其會遇坎當復止邵生故秦吏乃亦睹茲理賢哉
感我懷三歎不能已

子真初亦仕歲晚乃逃之區區南昌尉上疏忘其卑忠

言不見用耿耿當告誰飄然棄妻子終身與世辭抱關
甘貧賤所貴莫我知至今九江濱清風激羣黎神仙信
茫昧此士獨不疑孤雲無定在逝水何時歸遐思一矯
首悵望無由期

悠悠空山雲泱泱長江流廊廟意不屑山澤聊淹留故
人在天位高步追巢由豈曰子無衣辛苦被羊裘東京
多節義之子乃其尤窮居雖獨善輔世豈不優

汪汪千頃波不為人濁清道周言行表蕩然無得名誰

言牛醫兒乃是人中英當時無間言後世流德聲思之
不可見使我鄙吝萌淳風久已漓此意豈復明時無君
子者雖賢寧見稱

南州有高士食力事耕稼優游聊卒歲不矯亦不隘大
木行欲顛紆纏豈足賴何為諸老翁棲棲不遑舍斯言
非無見明哲自高邁誰能懸一榻待子來稅駕

鹿門何亭亭下有避世賢鳳雛隱中林卧龍蟠其淵一
朝起高翔斯人獨深潛功名不可為我志久已安一聞

耆舊傳使我心悠然

黃鵠羽翼長一舉思千里
幼安本中原垂桴走東海
舉世方尚同遠引存吾志
流風漸異俗敦禮化鄰鄙
子魚平生友胡乃不相委

塵事非所便田園久見招
歸來三逕中蔚蔚長蓬蒿
雖有荷鋤倦濁酒且自陶
茫茫大化中委運將焉逃
唐虞去已遠由來非一朝
粲粲霜中菊采采忘其勞

趙孟頫

題子昂兄畫錢德鈞水村圖

暖暖水邊村蕭條絕塵滓錢君智者徒而後能樂此平生邱壑情所向政在是問誰為此圖吾兄固能爾

鄧文原

題高尚書夜山圖

吳山面滄江中秋氣颭爽樓居謫仙後公退謝塵鞅孤月出海上高懷一俛仰佳哉高侯畫得意超象罔我來秋向晚月色寒莽蒼山遠落木淨風高怒潮響奔騰萬

雲氣忽駕蒼虬上平湖雨翻江渺渺波蕩槳回思圖畫
時歲月儵已往山川更晦明陰陽遞消長人生何獨勞
局促老穹壤我將乘倒景千載縱清賞松喬遺世人一
笑凌煙像

題張繇所畫霜林雲岫圖

慙余生也晚未能識君顏宿秉川嶽氣時發胸臆山澗
壑自回互溪流若縈環雲光映天色秋葉舒錦斑室中
有揚子向晚啓元闕何如塵外侶日夕相與還悠悠笛

中意未許落人寰

盧鴻廬嶽觀泉圖

九江峙廬嶽盤回幾許深絕壁倚霄漢
濺瀑直千尋颿颿松風至髣髴蒼龍吟
疊石挺瓊樹飛樓起危岑流沫灑虛闌
長歌響澗陰雲深草木潤風度煙景沈
何來暫傳轡於焉散煩襟余以罹塵鞅
未得諧夙心能知此中意奚事方外尋
良圖為爾襲比勝雙奇琛

清溪謁象山先生祠

我行厭塵役愛山極幽阻及茲叩巖扃浮嵐薄窗戶危
石倚蒼屏盤盤一洞府邈哉混沌根疏鑿自太古或疑
昏墊初屹立中流許懸崖瀉驚瀑灑空作飛雨泓渟水
鏡虛林影淨可數石闌少流憩樛枝啼翠羽山花明炫
目鮮逕劣容武陵上高明臺桑麻蔽村塢却笑羣山卑
矜春相媚嫵了如靜者性孤潔恥俗伍昔賢此鳴道松
風入談麈教鋒振羣哇朋簪謝華組末學分畛域正道
日榛莽嗟余嗜探蹟離索增歎恤入舟耿清夢前溪聽

鳴櫓

袁桶

舟中雜詠十首

好花辟車塵飛入黃河洗河流政茫茫一去不得底納
汙有至道胡為愛清泚念茲物理深元籥從此啓

飛雁翔南雲辟就端有得舊年春風歸雪花大如席陰
陽眇難窺造物司其職慎勿事炎涼來往任行役

道逢射生船有鶴馴且臞青絲閉其目病翼寒蕭疎臯

禽九天來此豈真吾徒獨憐羽毛似盤桓為長吁

家奴拾枯草走兔來相親生來不識兔却立驚其神行
人笑彼拙歸來始嚙呻乃知特幸脫未信吾奴仁

白葦生寒沙殘花搖散帚燕都百萬家借爾作薪樵物
微生最下功用乃堪取大勝桃李花矜矜鬪妍醜

清夜視北斗正色搖我前乃知中州殊詭詭浪談天
公化南國美教來自燕乾坤儻一致地氣何由偏

紙鳶帖晴空飛輪走盤線東風恣昂藏得意隨手轉攀

雲政相喜墮地忽復怨兒童豈知此得失終戀戀
惡馬少駕車駕馬多駕船駕船勿戚戚駕車何翩翩渠
命有通塞誰能別姪妍君看鹽車下淚墮如奔泉
春菰種北土三年變蔓菁一為居養移自覺顏無情南
山植松苗深根定生苓千年化豎魄豈比春菰榮
鷓鴣漾晴空意態極楚楚翻風蒼雪迴轉日爛銀舞盤
旋傲孤鴻清遠敵凡羽須臾下魚陂媿我覺疾去

大名劉節婦吟

孤鶴不累巢離鸞不飲溪溪明難為影巢成誰與棲飄
飄無根雲流麗如虹蜺下有貞松臺白日晝且淒我思
徹霄漢冥邈不可梯青青東園柳子規當樹啼來者何
用歡去者日以迷擊石端出火擣辛能作齋妄心儻未
明請看井中泥

送趙虛一道士降香南海諸名山

往從虞伯生
降香成都

振策我眉巔身輕瞥飛鳥懸崖飲湍流側石穿暗篠高
騫蕩心目每恨所歷少捧香南溟使絕足騰驤裊龍淵

明玕秀恍惚百靈瞰乘飈訊八公挂席招五老巖光候
陰晴水氣變昏曉神君層巒倚商祭通杳眇念昔結空
寂厓广絕登眺希彼巢居子寢作止林杪鐘鳴驛吏動
危坐萬籟愀餘齡水赴壑歷塊跡電掃韜精習澄觀俯
矚八紘小

飲酒雜詩

錄四首

京師二十載酒中有深歡大雨即閉戶朔風嘗解鞍客
至輒笑之是豈宜居官振容筮神著鴻飛漸于磐百歲

苦世短萬鍾非我干所以東方生吏隱神益完

陽鳥乘南雲飄飄振奇翮迫此梁稻謀居移遂成客媿
我食京塵誓墓志未獲雙峰十丈松下有千載魄當年
侍蓬瀛香芸森寶冊高齋集遺編朱墨猶手澤戰兢媿
匪承永念在行役

弱冠不飲酒篝燈橫玉繩或云酒中趣湛湛浮雲蒸棄
書試其言果若烏輪升天根轉晴雷堅城為之崩妙言
粲瓊屑逸興追飛鷹醉鄉儻可居無功乃真朋

江梅生空林歲晏美無度挈身踰朔易塊獨此室處羶
房望朝陽耿耿不得語雕籠粲珍禽悵望秦鄉樹爰居
東門止盛饗非素茹臨風嗅其英雅志懷故土

觀真文忠公畫像

羣賢輔絕學嵯峨武夷峰熒熒方瞳光汲汲汗簡中緬
懷文明初蒼珮極匪躬執筆侍玉署妙語工彌縫飛塵
變蒼狗潛淵閔游龍空餘經濟心勞徠飢飛鴻濁水投
神膠揚清乃奇功喬松不並世寒飈轉秋蓬生世我已

後正緒遺顓蒙惕然拜公像斯道非終窮

次韻元復初春思三首

凍樹迴青陽羈禽競新哢喧喧人語浮稍稍春事動澄
心絕芳華小睡足幽夢夢覺天宇新朝光集飛棟

遊塵逐平臯秀色翳榛莽油雲互東西鬱抑不能雨昭
蘓在元功竟夕復延佇何當挾其巔振翮窮委羽

遠客芳草思湛湛天外舟坐令親知疎低徊此淹留古
樹擢奇石清流匯芳洲素心諒有在胡不為茲遊

送薛元卿歸吳子時有上京之行

飄飄江海遊渺渺關河役燕鴻有相避客子無定跡南
山火雲高北山雪新白想此六月時相顧各動色埃傍
青松樹上有雙鵠翼愛君慎舟楫戒我專寢食擾擾行
路難風花亂如棘

芳思亭

並序

大父尚書公治圃南郊有堂亭凡十五方池修廊
屈折便宜雨甚亦無礙遊事逮今荒廢踰四十年

故基陳迹不復可考近築一亭雜植花木廣不踰
畝髣其萬一名之曰芳思玩其英華將以紬繹志
興翰墨有紹是則先公之志作詩示瓘瑾並求親
友同賦

侃侃尚書公投紱理泉石五堂適寒暑十亭送昕夕瓊
英元圃秀美蔭嘉樹碧修廊不受雨來往隨履烏紅雲
漲方塘丹霞耀翠席嘉魚黃金掌瞥見眇莫測辛勤三
十年深逝晦朝蹟遺訓示子孫樹藝比其德浮雲變須

史百幻倏消蝕空餘鄭公莊耕稼給衣食緬彼行樂時
種植各有職以茲一畝園髣像見疇昔幽葩與羣卉生
意日不息朝陽漱靈根三咽妙紬繹曠懷事幽賞逝矣
躬六籍

居庸關

太行領羣山萬馬高下拜平巒轉城隍隱隱南北界危
坡互交牙寒溜瀉泚泚陰風元虬湧巨石忽地壞周遭
青松根下有古木砦石皮散青銅云是舊戰鎧天險不

足憑歷劫有成敗驅車上林杪出日浴光怪肅肅空巖
秋天風迅行邁

雨中度南口

天寒絕禽鳥獨聞子規啼石壁飛雨驟衆木搖淒淒瘦
馬蹴亂石高下齧其蹄陟嶽沮如深漸覺所歷低暝色
起亭午土屋流寒泥須臾過雷聲倏忽生晴霓水清亦
可度戒僕踰前溪

度懷來沙磧

沙清圓石瘦千里聞風聲驅此殼鯨車索索莎雞鳴遠
山列翠席近坡環碧城高下各有險轍跡那由平驚兔
導我前歷錄為之驚天低雲搖蕩土曠塵縱橫謬膺翰
墨選遠行有期程迴頭望南坂初月隨風生

登候臺

蜿蜒西龍岡綠草搖晴波旁有雙玉井石角增嵯峩明
良佐神運目力窮坡陲層垣睥睨雄寶構通義娥昂昂
鐵竿聳飛鳥光盪摩土屋黏蜜房文氈圍錦窠緬思皇

猷遠默止松林戈匪以清暑遊跋履勞鳴珂陰森晚色
晦寒沙聚羣駝悲茄月初上戴斗瞻天河

桑乾嶺

茲山西北來旋轉十二雷昔人望鄉處生別何崔嵬我
來坐絕頂雲漢森昭回出日騰金鉦積露流銀臺長空
不受暑雪花散皚皚氈車引繩過屈曲腸九迴微蹤媿
三至南望心低回長風馬耳迅何當賦歸來

龍門

蒼厓出雙闕羣山頰首尊陰風起晴雷摩盪晝日昏鐵
峽擁偪仄百川為之奔疑下有龍湫逞怪蹲天門渾兮
出膚寸頃刻黃流渾側徑出石壁巨浸存遺痕緬昔設
天險事久難窮論征衣襲輕雨神君儼雲根

曉發

蓐食慎王事曉星當前戶跨馬官道行細草泣寒露亂
石鳴琮琤啼鳥守荒樹行行未十里問堠坐當路年衰
脛力拘望遠彌窘步天風卷飛蓬白日互吞吐深知非

世才歸畊誓先墓

灤河

近山馬昂髮遠山鳳騰羽百谷奔亂流屈曲長蛇赴維
時雨新過急溜糟牀注居人滙為井千屨集沙步寒光
澄玉膏甘冽過牛乳茲泉成白溝巨浸合沮洳蓮芡充
餽糧魚鰕足租賦塞翁話疇昔陋彼成險固往事不復
論汙汙日東去

懷伯生

春雨消路塵春風散林纈蕩蕩長安門客子千萬轍城
陰有一士淡食羹不啜采彼松上露煮石化晴雪沈冥
護真性觴至那復說向來舌本淡今作耳根熟維南有
樛枝巖溜滋百結在德良自防居屯詎為折念此長夜
深寒光吐殘月

滕斌

感遇九首

宇宙忽空闊飲馬萬里流平生負兩眼及此行寓州天

清健鶻運木脫飢鷹投長風吹海雨濯我紫綺裘相逢
半游俠把酒髯如虬慷慨說史記歷歷山川秋向來衣
帶水目斷何無舟

吾愛東方朔高揖金馬門向非玩六合安肯來崑崙昂
昂九尺身談辯黃河翻誰知上書意蛾眉非自婚不見
馬相如俛首狗監恩人生非桃李何故不自言

吾愛李太白玩世如游龍自知天上謫何必人間容海
風吹綠髮蕭蕭卧雲松我昔夢見之遺以金芙蓉清輝

恍在眼日落峨眉峰

西風桂花落我上天台山仙子扶我手冷然蒼水環乘
鸞者誰子飛煙渺難攀三坐此游戲弄影銀河灣空山
忽風瀑四顧鳴潺湲長揖馬子微此豈非人間

春風如綠浪淡蕩洛陽柳高樓語錦瑟落花泛綠酒何
人白鼻騮蒙茸紫貂袖一字或未識銀菟懸兩肘煌煌
貝宮珠迺落緯蕭手爰居偶鐘鼓犧牛竟文繡終然同
一畫豈復論好醜誰知草元者寧春蘭白首

步出湧金門所見土花碧徘徊衣上月感此美人夕美
人何不歸月落江水白寒潮已復去海馬曉無跡萬弩
射鯨魚駭浪接天赤空聞魯仲連孤感橫八極哀哀精
衛石填海竟何益

贈客黃金羈勸客白玉卮昔我亦為客得此慨不辭小
草戲其出櫝榔笑其飢相識何所無所樂心相知平生
數公子胥下珊瑚枝冥冥或相隔寤寐恍見之無絲繡
平原無金鑄鍾期秋風山陽笛淚落不自持

卷十四
贈我火浣布報君吉光裘一笑結意氣呼酒黃鶴樓神
交豈待語與子為天遊攜手閨風觀濯髮扶桑洲下視
俠少年笑嬉歲怨尤世無羊左烈風雪且自謀東井不
可酌天駟豈服輶

船頭書十乘船尾酒百壺酒盡書在眼落月如明珠忽
悟八陣法縱橫如河圖惜哉經世士未有窺唐虞季子
相六國所見惟陰符

張養浩

得子強也書詩以荅之

有客附書至封識墨尚新展讀笑良久勸我歸及辰我
豈不汝懷愛此泉石鄰官事亦既簡又多素心人劉生
書滿家揚叟酒味醇而况俱好客有假眉不顰緬思霄
壤間實與逆旅均焉往非寄寓奚必家園親置書桃笙
底且復樂我真

夜雨寄呂叔泰

隆隆暑威歇稍稍秋意深豐草漸改色穹林亦蕭森况

茲風雨夕微燈翳寒陰潛蛩洩幽語徂雁遺哀音以我
耿耿懷知子難為心含情睇層昊咫尺猶商參裹飯孰
子遺載酒孰子斟豈不欲一往畏彼泥潦侵古人道義
交非惟讓分金斯事久索莫念之恨彌襟願言軌前躅
尚期勗來今

登司天臺同李景山元復初分韻得色字

湫居厭紛厖升高百憂失河流耿微明野燒還故碧太
行望中低斷處仍雪色翠華天尺五金城年萬億美哉

山河固兩有險與德區區遼與金銅駝幾荆棘開闔看
煙雲興廢感今昔所恨難久留悲風晚來急

長安孝子賈海詩

天歷元二載西土罹薦饑愚時拜中丞帝曰汝往釐嗽
嗽三輔間十室九困疲行者總溝瘠居者恒餒而親戚
自魚肉遑恤父子離鄆縣民有賈竭力奉母慈闔門為
口四一妻仍一兒操瓢日行丐有得歸母貽不幸值虛
往見母顏忸怩退省百無有滿屋風淒其以湯和糠粃

進母母不怡曰我幼汝飼非珍即甘飴而汝今我哺以
我犬豕為况我老且病累汝無幾時子懼白其妻無言
第頭垂妻曰攜此子從鬻無問誰市呼不見售復歸泣
漣漣子心救火急兒命累卵危陰攜至他所恩愛從此
辭解衣縊不殊反為子禁持取盆拔佩刀手足隨紛披
紿云黃犬炙雅於補衰宜母知口腹美不悟骨肉虧子
幸母解顏不計妻攢眉余聞驚此言怒詰官失治使民
至如此賑貸猶遲疑即引造行省使細陳毫釐且命出

兒肉闔府徧示之飭諸相坐前余為失聲悲促掾狀其
故聞上星夜馳或將復徭役或將表門楣或斥兼金賜
或選好爵縻上以勸臣子下以安期頤廷議必不爽命
下會有時昔人有埋子天憐以金遺復有貨視者哀鳴
走通達亦有棄半途完姪與相隨未聞刃所愛萬古猶
絕奇嗟哉賈生心世俗彼烏知母以賈為忍母以賈為
癡子失或再有母失庸可追孰能庭桂惜使我堂堂姜
惟其持是心屠子如屠狸粵從王政圯風靡俗亦漓子

囊錢貫朽母篋無針錐子妾曳綺羅母裯露膚肌不慮
親猶天以利為根基不究身何來以貨為宗枝於物尚
爾靳矧乃襁褓私嗟哉賈生心堪為世俗規嘗聞前哲
言一孝蓋萬疵孝可包衆善孝可動兩儀孝可神鬼格
孝可賢聖期能孝斯能忠厥心自親移願彼為人子終
身誦吾詞

史稱希孟為行臺中丞聞民間有殺子以奉
母者為之大慟出私錢以濟之即此事也

曹伯啓

和傅荏山九日秋闈

宦遊何所得歲歲客殊方馳騫不自已別離是尋常資
身素無策返愧工與商光景一何速瞥然度飛黃瀛洲
良不惡復到澄清堂借問堂主人生平果何長夢想粉
榆社披襟坐藜牀晦息存夜氣晨興玩天光云胡不歸
去老大徒悲傷秋雨忽開霽乾坤變清涼偶於職守外
泐檄監文場諸生競葩藻寸晷何倉皇藩臣喜揚激賓
筵秩觥觴秋陽暖慈闈春風遊帝鄉瓶中有紅腐穩博
大官羊

蕭縣道中早行

行行古天塹
冪冪桑與梓
樹枝防刺人
天明僅十里
功名果何物
白髮仍早起
賴聞瀑水聲
清徹畸人耳

張珪

登茅山

久矣厭朝市
心棲巖壑幽
今朝復何朝
陟此蒼峰秋
玉宇正寥廓
風籟寒颼颼
平生獲壯觀
萬里供寸眸
煙嵐縹緲中
青原間桑疇
琳宮一何麗
突出寒巖陬
茅君此

仙去遐想希前修胡為塵土蹤歲月徒悠悠何當乘雲
蚪八表同周流念念竟忘言凝神入冥搜彷彿鸞鶴音
還來故山游

喜客泉

昔聞喜客泉今來欣見之俯檻一凝盼珠璣沸清池山
靈蘊神秀出此天下奇嗟余時所忌而泉喜何為丹忱
天自知願茲諒弗疑

盧亘

送侍講學士鄧善之辭官還錢塘十首

錄五首

北門古深嚴論思寄籌度自非鴻才士訓誥何由作夫
君出巴蜀文采動京洛十年掌絲綸搞藻揚景鑠荆璞
抱瑾瑜龍淵淬鋒鏑肯獻上林賦寧居天祿閣即今觀
浙江眷戀睇金雀黃圖鬱紫氛絳節森碧落依然難為
情清霜捲飛藿

離離天星高皓皓雲月光候雁過楚澤蟋蟀鳴中堂天
時諒難測徒然多感傷念子去意遠沈憂結衷腸憶昔

初奉歡露白春蘭芳清尊罷新製妙趣深濠梁飛景急
西匿川流浩湯湯元髮淒歲晚木脫天雨霜蔓草豈容
惜松柏在高岡

翰林子元子武庫森戈矛英聲邁千古逸韻橫九州與
君契金蘭投分何綢繆清和謝夷惠典刑追韓歐坐令
人文煥允塞昭王猷念君獨遠邁寥落行人愁木瘦楚
山曉風靜寒江流何當駕飛車却憶昆侖邱塵埃滿腥
腐朝暮同蜉蝣

昔我適吳會日夕承歡顏高堂樂起舞綵服何徧攔東
海洶波濤西湖翠煙鬟北歸餘十年謬蹟通朝班家禍
一朝集音容何可攀悲號蒼穹迴往事思日艱命窮時
亦迫志弱體自孱安得騰化術從君超人寰執手不忍
訣臨風涕空潸

我留君勿思君歸我當憶十年膠在漆一旦各異域吳
江激微波震澤起暝色鷗鵬隔天地雁鶩雜南北念我
平生友愴恨摧胸臆獨看燕山雲歲暮日初昃永言長

風翔情寄南風翼

題華山太古雪贈人

太古雪石名

往時天大風能吹華山裂墜此一拳石咸云太古雪粵
自開闢初雲氣所凝結已經六萬歲變化同截葉望之
色正白表裏共澄澈塵土不能浣光彩耀日月願君勿
愛此持以獻金闕回中避暑時可用清毒熱

任士林

用韻酬陳渭叟林伯清

我本厭塵市志在棲幽清
還聽客城雨深夜愁寒更山
中兩道士孤鐺煮雷鳴
漱沐得清謠久却世上名何用
王子喬相從學長生

御選元詩卷十四

謹案第十三頁前六行大祀須臾盛刊本祀訛祝

據趙孟頫松雪齋集改

欽定四庫全書





總校官庶吉士臣侍朝

校對官檢討臣蕭九成

謄錄監生臣周元